

## **PENAMBAHBAIKAN OPERASI DAN PENINGKATAN PRODUKTIVITI PERKUKUH PRESTASI TH PLANTATIONS BAGI SUKU PERTAMA 2026**

**Kuala Lumpur, 21 Mei 2026** – TH Plantations Berhad (“THP” atau “Kumpulan”) mencatatkan untung sebelum cukai (USC) sebanyak RM29.55 juta bagi suku pertama berakhir 31 Mac 2026, mewakili peningkatan sebanyak 15.68% berbanding suku yang sama tahun sebelumnya.

Prestasi yang lebih baik ini disokong oleh pencapaian operasi yang lebih kukuh serta peningkatan keuntungan nilai saksama ke atas aset biologi, didorong oleh peningkatan pengeluaran dan kecekapan operasi ladang dan kilang yang lebih baik, meskipun harga komoditi direalisasi bagi minyak sawit mentah (CPO) (RM4,120.00 S1TK2026 berbanding RM4,722.00 S1TK2025) dan isirung sawit (PK) (RM3,227.00 S1TK2026 berbanding RM3,551.00 S1TK2025) adalah lebih rendah bagi suku tersebut.

Sepanjang suku ini, hasil meningkat sebanyak 16%, manakala OER dan KER masing-masing bertambah baik sebanyak 6% dan 13% berbanding tempoh sama tahun lalu, mencerminkan prestasi operasi yang lebih mantap di seluruh ladang dan kilang Kumpulan. Tumpuan Kumpulan terhadap pengoptimuman inisiatif “low-hanging fruit” telah memperkukuh disiplin pelaksanaan, mempercepatkan penambahbaikan operasi serta membolehkan pencapaian hasil yang bermakna secara lebih cekap dan konsisten.

Kumpulan merekodkan hasil sebanyak RM189.48 juta, meningkat 3.33% berbanding suku yang sama tahun lalu. Peningkatan ini didorong terutamanya oleh jumlah jualan CPO dan PK yang lebih tinggi masing-masing sebanyak 20% dan 18%, disokong oleh peningkatan 9% dalam pemprosesan buah tandan segar (FFB).

Menurut Datuk Ts. Borhan Bachi, THP akan terus mempergiatkan inisiatif pengoptimuman kos di samping meningkatkan produktiviti ladang dan kecekapan penuaian. Inisiatif ini dijangka dapat terus memperkukuh daya tahan operasi Kumpulan serta menyokong kestabilan pendapatan. Langkah-langkah ini amat penting dalam menghadapi ketidaktentuan ekonomi global yang berterusan, cabaran pasaran buruh, serta ketidaktentuan harga komoditi.

### **Prospek**

Bagi baki suku tahun kewangan 2026, Kumpulan menjangkakan persekitaran operasi akan terus mencabar, terutamanya dipengaruhi oleh ketidaktentuan harga minyak sawit mentah (CPO) serta peningkatan kos operasi susulan ketegangan geopolitik yang timbul daripada konflik Timur Tengah. Ketidaktentuan yang meningkat dalam pasaran tenaga global telah menyumbang kepada kenaikan kos bahan api, baja dan logistik, yang merupakan komponen input utama dalam operasi perladangan. Tekanan kos ini dijangka berterusan dalam tempoh terdekat dan mungkin terus memberi kesan kepada prestasi margin Kumpulan.

Walau bagaimanapun, harga CPO dijangka kekal menyokong. Pergerakan keseluruhan harga jualan CPO dijangka mampu mengimbangi peningkatan kos operasi, sekali gus memberikan impak positif bersih kepada prestasi pendapatan Kumpulan. Namun, keanjalan margin keuntungan akan tetap bergantung kepada keseimbangan antara harga jualan dan peningkatan kos disebabkan kenaikan berterusan dalam kos pengeluaran.

**TH PLANTATIONS BERHAD (197201001069 (12696-M))**

**Tingkat 23, Menara TH Selborn**

**153, Jalan Tun Razak**

**50400 Kuala Lumpur**

**Tel: 03 2603 4800 Fax: 03 2603 4695**



## Mengenai THP

Sebagai cabang perladangan kepada Lembaga Tabung Haji, THP terlibat terutamanya dalam penanaman kelapa sawit dengan keluasan tanaman melebihi 55,000 hektar merangkumi 38 ladang dan 6 kilang di Semenanjung Malaysia, Sabah dan Sarawak serta di Kalimantan, Indonesia. THP mula diperbadankan pada tahun 1972 sebagai Perbadanan Ladang-Ladang Tabung Haji Sendirian Berhad dan telah disenaraikan di Papan Utama Bursa Malaysia Securities Berhad pada 27 April 2006.

*Untuk maklumat lanjut, sila hubungi:  
Asmad Putra bin Abdul Samad  
Ketua, Perhubungan Pelabur & Komunikasi Korporat  
TH Plantations Berhad  
Tel: +603 2603 4774 Mobile: +60123785701  
Email: [asmadputra@thplantations.com](mailto:asmadputra@thplantations.com)*

**TH PLANTATIONS BERHAD (197201001069 (12696-M))**

**Tingkat 23, Menara TH Selborn  
153, Jalan Tun Razak  
50400 Kuala Lumpur  
Tel: 03 2603 4800 Fax: 03 2603 4695**

